

補

勤

詩

存

補勤詩存卷之二

山陰 陳錦 晝卿

過庭草下

咸豐辛亥至癸丑

咸豐初粵氛竄擾江南捻匪萌芽山左癸丑三月
陷金陵漸逼蘇杭人心岌岌予方三上計偕下第
南返時先大夫司鐸昌化十九年矣耄老思鄉引
疾還里感時紀事偶寄謳思作過庭草卷下

元宵

洪湖三插水如潮盈尺河流橫短檣千里紅塵蔽明月

去年今日是元宵

謂庚戌計偕北上
時黃河尚未北徙

未嫻車馬強登程皇路清平許夜行載道飢民頗乞食

長官猶自不知兵

鯉庭詩禮舊青氍夢息輪囷又一年底是書生憂國早

烽煙初起瘴雲邊

時間髮逆起廣西

親年容易遠遊難歲月潛消首舊盤聽得東風鶯語滑
杏花時節每彈冠

畫梅圖賀宋偉亭新婚

江南江北春正曉斜入窗東一枝小賦梅人卽畫梅人
知是廣平是京兆

程聚甫獨立圖

珊珊玉骨矯臨風積健爲雄倚傍空一立幾人足千古
鯉庭詩禮雪門中

腳根立定不隨人俯仰乾坤見此身爭向鼇頭誇捷足
問君何處踏陽春

胡午亭自中山回越惠書詩以報之

中山行中山行與君同聽秋蟲鳴金臺驛金臺驛與君
一別復再別君不歸兮我行孤飛沙潑面秋風靡荒店
寒燈一杯酒銅琶鐵撥歌鳴鳴與君同是長征客先後
驅車合車轍我行河下楓葉紅君行河上楊花白楊花
楓葉冷看人身上征衣衣上塵大隧如山雨黃土盡日
雙輪走雷鼓我歸唐山君張川落月停雲吳越天問我
山中何所有湖上分來一枝柳明月清風蹕路旁清風
中山南北雨驛也爲五不蔭行人蔭書牖更有數株棗
臺山蹕路多柳底行人

竹坡公亭彷彿蘇泉花木繁青青

坡公亭在昌化治北二里蘇泉在定州北

三十里

皆多竹萊竹生孫我生子老人喜曰今添丁

九月九日舉一子

此外別無些增長打算行裝車一兩槐花未黃我先忙
行裝羞踈徒徬徨徒徬徨行路長中山之友不可忘汶
水湯湯記行迹雪泥爪印題塵壁請君摩壁也留題停
車爲我須臾立

周聽甫負樵圖

放翁腳下雙不借響踏風聲雨聲碎滿林黃葉爛何山
神僊洞裏觀棋還一竿雲影隨之走半擔斜陽紅在手
昂藏結束獨行行未許旁人掣其肘知君矢志克家賢
析薪負荷傳薪傳豈是山林假隱逸大有天地眞仔厝

買臣五十偏易老富貴端須致身早三尺橫腰是斧柯
登山便趁青山好

禮闈報罷送應敏齋孝廉

寶時

歸武林

壬子

五陵同學滿瀛洲
襟襟心情負盛遊
千里行窠將夢裏
一年春事替花愁
相依客路成蛩駟
爭共名場走馬牛
如此光陰忙裏過
南風吹老麥天秋

婪尾春陰倦不支
章臺楊柳又垂絲
功名眼熱來偏早
書卷心寒讀已遲
賈誼懷才先射策
劉蕡下第况吟詩
相逢莫翦西窗燭
強半人間話別時

也逐京華瘦馬馱
無端萍聚此閒多
文章老我雖毛脫
事業輸君盾墨磨
有用書生良不易
憐才天意竟如何

鑑湖菱芡西湖藕少箇詩人作權歌

送珊士同年入中山舊遊

又從斯地挂行旌惆悵飛蓬不定身歲月無多消逆旅
文章有數泥紅塵浮雲片影遲遊子夜雨孤燈賸故人
此去端須強餐飯平安二字慰慈親

衆香花木正嘯鶯

衆香園在中山治東

祇道鳴春爲不平偶借名

山耕片石肯因升斗縛長纓工愁似我難爲別多病如
君竟獨行寄語盧溝好明月梅花時節數歸程

九月二十日作

小住長安市蕭齋坐寂寥天雞號獨夜城柝逼殘宵詩
興家書破燈魂旅夢銷故園空記憶霜信菊花朝

一片青氈裏漂蓬偶定身

時方館家慈
園中丞京邸

春山曾送客秋

月又撩人鄉思寒逾緊
羈愁病更眞
臨風彈不盡衣上
十年塵

猶記青燈味兒時受一編
遠遊慚舉業易老是親年
鄉樹三秋色征衣九月天
驚寒誰共語歸雁塞雲邊

雪夜煎茶贈子壽袁十並呈孫心農同年家小

圃比部

漫天風雪轉蓬身暫息輪蹄近

帝園

邱齋在宣
武城隅

鄉樹

同縣千里月嶺梅來報一年春
偶從萍水逢知己難得

茗岑遇故人願埽瑤階花六出
園鑪煮茗洗紅塵

龍井香分水一甌
寒窗書味倍清幽
無多好友皆爲客

強半詩人是病愁漫爲風塵憂失馬不應身世逐浮鷗
明朝西嶺看晴旭幾輩同登閭苑遊

夕照寺和方在卿孝廉可禪方外詠雪用萬柳
堂原韻

寒齋風雨記相思一字吟安是我師卻道東坡偏佞佛
本來支遁亦能詩養成松幹雲爭宿清到梅花月不知
悔殺紅鑪煨芋火嬾殘相見十年遲

且喜軒開挹翠幽

寺有軒曰挹翠

明朝佳客許從遊

約與孫心農同年偕

遊

爲尋竹外煎茶約來沈天涯破鏡愁

心農新寡

冷嚼煙雲

同把盞寒衝風雪一登樓家山香火今何在拄杖曾探

石室不

夕照爲昌化石室寺分支

感舊誌夢

書燈挑爍燭成灰
旅館圍爐夢乍回
舊恨新愁刪不得
雁聲橫破雪天來

高堂廣廈遇神僊
昨夜相尋大幻天
怪底應門僮僕老
十年前已下黃泉

依稀侍餽面山樓
老母還緘宋遺愁
不道紅閨人早死
相逢地下失驚不

聞端生姊赴音寄姊夫姜春士

碧海青天萬里心
可堪骨肉愴懷深
君添夜月離鸞曲
我有秋風斷雁吟
蜀錦挑殘蘇蕙字
湘雲愁絕女嬃砧

九京一樣嗟河廣
回首藤陰

謂勞氏婦家

似橘陰

謂吾家故居

和方在卿誇臘八粥詩

積雪空庭月似銀詩蘂分韻憶吟人
搗來飯後雙弓米

方寓夕照寺

痛洗尊前萬斛塵
淑氣未催宮樹綠鄉心初逗

嶺梅春明朝便訪袁安宅
徧地霜痕齧畫輪

坐臥行窠又一年霞山雲水

皆昌化地名

記僊緣封侯有分

應投筆作客何心尙枕鞭海內於今多戰伐

粵氛正熾

天涯

何處學逃禪芸窗小住慚佔畢徒羨梁園賦雪篇

消得輪囷鐵未能書生抱凍似寒蠅爭傳羽檄馳天馬

節相賽尙阿受過畢陸刀討粵賊

驚兒貂裘角臂鷹

羽林肆武禁城

翦燭且邀

青眼客舉杯曾醉白頭僧

雲巖上人善飲

萬家風雪愁行路昨

夜城壕已渡冰

青氈一片逐征衣，異地猶將世業依。
宦味無聊歸計決，家君足疾辭官親年已邁故人稀。
武林戴醇士年伯屢召不起姚江朱久香年伯時方假歸，
澆書寂寞心偏熱，懷刺句留事總非。
屈指稽山春雨後，采茶歌老筍尖肥。

都門度歲寄內

朔風凜栗掩窗扉，地白中庭積雪飛。
旅館宵寒眠不得，重衾如鐵又添衣。

默坐焚香萬慮空，羞將頭腦學冬烘。
燈花欲報平安信，催起鄉心一寸紅。

故園梅雪已經年，惆悵花枝對月眠。
愧我泥金書未報，教人消息卜金錢。

鏡險光耀月輪明消受驕兒夜讀聲休伴寒燈理金綫
獨聽征雁到深更

每日鴛機罷織梭記曾同硯學虞戈綠窗夜靜須消遣
磨過金壺墨幾多

要把新桃換舊符百篇佳詠讀完無深閨幸有吟詩伴

裁取紅箋問小姑

謂水卿妹

戈印初懸弄阿侯瓶花移影撥閒愁衙齋近水多楊柳

春到枝頭莫上樓

時值兒子周歲

萱堂久別思依依會恨門楣鳳早飛指日扁舟歸鑑曲

呢痕猶認嫁時衣

得家書知今春將之越歸甯

羞被人稱宅相賢漫誇溫嶠是神僊東牀一榻陳蕃下

坦腹先驚總角年

婦家吾舅
氏故云

自憐賦質本疏慵
未許文場立戰功
不是青氈能誤我
琴書何故逐漂蓬

吟詩有癖是愁因
不忍緘愁寄遠人
一領征衫君莫問
明年重試杏花春

誰道姮娥解客心
不能傳語病鶯吟
祇今除歲雲天外
千里同聞爆竹音

癸丑元旦口占

癸丑

滿天風雪客京華
獨耐寒燈旅夢賒
爆竹聲中新歲酒
一年今日最思家

長安市上換春聯
似水流光席帽邊
寫入家書添一慰

歸期約計是今年

春正三日贈孫心農同年

念祖

看到春城雪萍蹤聚一年栖枝欣暫借旅榻幸重聯舊
誼蘭曾契高談茗共煎析聲嚴禁闔燭影悄寒甌筵語
邊風苦壺心宿凍堅簾疏涼月透屋老暗塵縣讀易朱
頗點論文墨細研西窗多勝友東道遇名賢陳小圃靜
北部
對耽枯坐神遊耐醉眠壯懷爭仗劍妙諦許忘筌整轡
駢金勒飛觴儷綺筵梨園觀健舞菊部觸漢絃愧我才
無範輸君筆似椽奪標誇捷足入定聳吟肩奉倩憂偏
及心農悼亡相如病又牽撥將茶鼎火催起藥鑪煙別恨征
衣裏閒愁席帽纏香炊菰米爛味領菜根鮮交本同方

合情尤久客憐光陰驚迅速令序倏推遷爆竹繁音聒
堂花淑氣扇門桃齊煥彩宮柳漸含妍曙色暄瓊島冰
痕解玉泉餘輝依鳳闕鄉思憶鷗天水勢弓弓曲山
形笏笏連蛾睂迷隋舊龍爪臥蜿蜒賀監遺詩宅方干
賸墅川塘因沿海直橋爲跨湖圓清可厂中佛蓬萊閣
上僊蘭亭支斗笠梅市盪梭船幾輩蒔蓑至誰家載酒
便叢祠明寶炬列肆炫星躔冠蓋填衢巷笙歌蔽墓田
筠籃分餅餌繡服踏鞦韆疊鼓諛神馬鳴琴引紙鳶頌
椒都得句詠絮盡成篇比戶舉珠箔妝樓耀翠鈿刀鐔
猜字裏釵股擲燈前此景新圖畫何時卜錦旋輪蹕消
風障書卷悟眞詮林有松堪種籬應枳獨編披裘明冷

眼吹帽認華顛樵徑宜橫笛漁村合扣舷園蔬烹紫筍
隴稻拾紅蓮打算閒中計句留物外緣淩雲遲獻賦排
日勉裁箋屢試銅街走空教鐵硯穿操觚鬚欲撚握管
指俱駢歲月庭闈晚謳思屺岵傳與君言執手知己話
殷拳荆楚干戈息 朝廷凱樂宣濟時需陸賈問路待
張騫偉業登壇著雄心拔幟先杏花風十里請著祖生
鞭

春雪寄懷南中弟妹

春雪復春雪萬里行人迹去年春雪晴行人向北行今
年春雪白行人尙爲客行人踏雪行且歌西山積雪高
嵯峨北風吹夢到天目隋碧芙蓉削寒玉千山萬山天

盡頭望見深林數椽屋數椽屋傍武隆居山光水色周
四隅古樹垂青瞰庭戶凍苔蟄綠湔階除百年老物青
箱在且讀高曾手澤之遺書故鄉況有好山水做廬舊
築醪河觴買舟合奉二人歸檢點莼鱸作滌瀟嗟予獻
賦遊京華征衣潦草行風沙欲辭毛義檄未放張騫楂
劇談剪斷夜窗燭獨坐聽老寒城笳春光轉瞬柳條吐
長安燈市喧簫鼓元宵無月也思家短檠爭耐吟聲苦
去年今日碧谿頭正是東風話別愁胡爲乎瓶笙欲語
音颺颺彷彿怒濤戰雨日夜鳴東流桃花之水木蘭舟
但願莎汀無恙眠閒鷗君不見荆楚將軍夜殺賊鬪艦
橫江瞰雲黑又不見西湖月滿小山孤繞屋梅花香有

無

夢送弟黔中行

昨夜春寒逼庭戶不夢西堂夢南浦一鞭斜日柳隄風
送子行行入黔土臨歧握手看征衣欲言未言淚如雨
再送應敏齋言別

天戈指日平荆楚十萬貔貅擁樓櫓金山焦山屯敝雲
長江如綫行程阻應侯年少志韜畧胸有奇謀思建豎
皇路清夷不用兵便向文壇樹旗鼓名場鏖戰十餘年
三寸毛錐抵强弩去年挾策共遨遊枕轡聽雞色飛舞
霜蹶同蹶少知音匣劍龍吟泣風雨須臾歸去話臨歧
蒿目鄉關牽別緒下第劉蕡意氣豪悼亡孫楚情文苦

敏齋時已悼亡與君同病復同愁吟聲宜製金蘭譜今年又復
假裝來道路軍書正笏午草澤風腥猛虎行海門潮熱
奔鯨怒問君到此欲何爲世事亡羊率無補嗟予束髮
困青氈大半光陰屬行旅憎命文章誤米鹽傷心絲竹
愁兒女龍鍾老父去官難一載門閭又延佇筆耨生涯
猶上農硯田惡歲支良賈閉門莫羨沐猴冠竈下羊頭
祿鍾釜大地湖山推故鄉吟壇半耳今誰主勸君且蓄
買山錢東望天台接天姥青蓮已死不能詩謝老青梯
俟已古茫茫世宙焉可知坐聽江南賦哀庾爲君惜別
爲君歌仰天搔首天無語

春閨月夜題壁贈綦陽楊建亭孝廉

村選

千間矮屋繞瓊樓
百度南柯夢不休
此地文章能換骨
人間風月盡低頭
塵根未斷槐花雨
舊話應憐桂子秋
自問青氈拋得否
墨痕如漆點鄉愁

一朝度劫便神僊
文敝銜枚又十年
夢裏征衣醒月裏
寒生襪被到愁邊
會須過此方投筆
叵耐看人先著鞭
吟罷新詩題不得
昂頭星斗自橫天

下第南旋適粵寇陷武昌踞金陵維揚京口長

江沮隔繞道圖

音垂山
在靖江山有感

木柿

本作
桃

東流斷片航蠟丸
南渡便倉皇
勸君莫上揚

州去從古揚州是戰場

金焦兩點瞰雲紅
林立帆檣一炬空
借去荊州還得否

大江千里煽腥風

鯨魚跋浪起狂瀾下第偏逢行路難
望見圖山青一角始知生入玉門關

可憐士卒慣昇平不道中原忽用兵
一檄長江天險在祇因專閫是書生

家君秉鐸昌化之十九年引疾告歸同人祖餞

作詩贈行因歷敘舊遊留別諸友

我與青山有奇遇家在飛來峯下住

敝居在古越南城飛來峯下青

山與我有奇緣層巒疊嶂遊髫年孤蓬初艤嚴灘宿畫

簷夾岸嘯雲綠

癸巳隨任清安

盪槳重臨茗霅谿登高恨未窺

天目

乙未隨任安市

家君仕隱託名區檢點琴書入畫圖

丙申始至

化昌虎豹當關奇石坐蛟龍出峽縣崖枯風聲水聲自相

搏羣峯聳翠羅庭隅飛泉夾道雲生甕僊村小結桃花

洞泉容一舟洞一車四圍山色青無縫我年十六登山

城滿地秋風落葉鳴自此林泉縱詩酒年年著屐山中

行隆岡頂上曾騎馬治北山觀碁幾度坡亭下山下有東坡亭

南屏鐘鼓宛西湖治前山岸碓春雲聽輶輶鸞峯寺後

溫泉徑停車記訪維摩病鸞峯寺溫泉井為予友陳少卿養病處支筇看

雨道山山名港繡畦方罫拓東南南有叢林副天竺山名道

場坪山名北千竿竹附磴平分石室寺名局長橋癯臥寒潭

曲城東何處遊最多紫雲迴繞石陂陀治東山更向城

西款琳宇謂治平寺釣魚沽酒酣高歌城西城東地咫尺老

母焚香叩迦葉並攜眷屬一題詩巖花無語燕支滴年

來我復遊雲川

時胡博齋居雲川

清齋趺坐學參禪別有高朋

出塵世箇中天地殊人煙山奇水怪不常有恣情攀涉

膽如斗絕壁曾援大纜登怒濤時挾鳴篙走鯉庭桃李

植新陰幾輩先鞭著祖生前有陳徐同下榻

謂徐渭濱陳午橋昆

季終軍後起爭飛鳴

謂錢晉齋

東牀一載留佳士

姊夫姜春士

羣

季歡迎博書史

謂子弟治卿諸弟保生福生聯生

阿咸年少亦能文

謂兄

子翰

短檠吟老寒窗紙願將世業守青箱矮屋風檐歲

月長卻悔傳經功未了操觚先已逐名場名場百戰無

寒暑一片青氈苦行旅笠屐晨侵茅店霜帆檣春飽桐

江雨高堂明鏡髮如星脣壽稱觥兩度經道韞當年初

設悅於今賦雪紉蘭佩

家君履任之明年季妹始生

總角嬉遊有惠

連錦標幾奪桂花天

謂治卿弟

嗟予曾破紅閨夢香車一再

迎飛鳳膝前兒女又成行早晚牽衣上學堂自愧行年

已三十頭顱羞對髯如戟征衣潦草客長安請纓無計

遭三黜望斷泥金願未成干戈滿路問歸程

時粵匪踞京口道路

多阻草澤風腥攫猛虎海門潮熱射飛鯨扁舟一葉衝風

雨夜夜江頭聞戰鼓依稀歸路指隆山千里烽煙接鄉

土隆山無恙竹窗幽老父龍鍾已倦遊道是莼鱸鄉味

好移家將入鏡湖秋寒濤聲裏揚帆去萬笏青山留不

住家人歡笑上行橈回首蘆廬隔雲樹雲樹蒼茫似夢

中猶記當年泊舟處雙谿渺渺黯情波兩岸清風動薜

蘿杖履卽今依鑑曲樓臺猶是戀唐阿況予徧訪高人
宅雪泥何處無鴻迹半生遊釣此間多那得臨行不傷
別臨行傷別作長吟留語山中送別人此去故人無長
物硯田有穀不言貧方今四郊已多壘故鄉幸有好山
水做居舊築投醪河掬取清泉滌煩猥貓頭春荀鼈裙
羹老人欣喜嘗滫瀡勸君豫約浙東遊南澗橋邊一繫
舟暢飲百杯家釀酒西窗來洗別離愁他年此地重登
眺我亦從君一長嘯買山爲卜子孫鄰似曾相識山應
笑

中秋日與錢晉齋同遊紫雲山寺並補勒綠雲
女史乙巳冬月題壁詩時予將侍二老歸鑑湖

矣十八年來雪泥鴻爪此地尤多臨去感懷綴
以長句

一徑入陂陀豁然見壇宇洞草栖春雲磴蘿宿秋雨潭
中天影空人心石上泉聲滴巖乳我來此山遊幾回笑
問老僧不能數但記初登此山時種松簌簌拂庭戶幾
年著屐聽風濤龍鱗百尺摩天舞後庭猶有紫薇花開
向尊前暗香吐昔年粉黛巢鴛鸞此日癭瘤穴狸鼠向
陽花木有滄桑何況人生歷寒暑同遊幾輩歎飄零誰
與煙霞共終古我今放櫂歸鏡湖更使名山兀無侶喚
舊驚心感北邙送愁無計吟南浦來與維摩話別離滿
林黃葉搖鐘杵摩挲題壁發長歌唧唧蟲聲動寒語

桐江途次還贈雲川諸友

廿載歸程此片航
蓴鱸初願慰高堂
未離膝下猶童穉
便道山中是故鄉
戈溜風濤扶杖履
巖灘星月洗琴裝
可堪舊侶憎新別
目送天邊雁一行

壘嶽重岡下碧潄
寢門欣喜說生還
硯田菽水當迎養
經訓箕裘抵買山
好趁飢驅增道力
漸因家食識時艱
蓬窗燈火懷人句
滿地秋風飛白鵑

補勤詩存卷之二

補勤詩存卷之三

山陰 陳錦 晝卿

陔養集

甲寅至己未

癸丑報罷禮試奉二老歸自昌化舌耕以養課徒
里門才峻從遊歲以百計凡五年中閒飢驅四方
驚心時事旣嬰風木之感復抱杞人之憂遠涉幽
燕近遊剡睦求官未獲避亂不遑所歷烽煙斥埃
道里山河寓意於詩得句尤少是爲陔養集

重至唐昌途中有作

雪泥鴻爪記前緣曾住名山十九年此日重來尋舊約
滿城風雨麥秋天

偶從斯地駐行旌
難得漁樵識姓名
不道劉郎今是客
臨歧依舊問歸程

故綠雲山房吟室

碧紗窗下綠雲栖
一覺蘊廬夢忽迷
好是雕梁雙燕子
攜雛歸去落香泥

朕得煙雲未了緣
芭蕉吟老別離天
至今卻憶妝臺月
愁聽空山泣杜鵑

榆錢滿地夕陽明
芳徑莓苔屐齒平
風月無情渾不覺
畫眉聲換讀書聲

今爲書室

養心軒讀書處

萬山圍繞碧雲居
廿載偷閒此讀書
花木有情懷舊雨

朝朝扶影上庭除

幾度雲窗坐綠陰青氈風味此中深寒蟲認得歐陽子
先作秋聲對客吟

方在卿出海上吟百首見示詩以壯之

行路難難於大海之波瀾乾坤浩蕩雲濤翻矯若不施
羈勒騎生馬怒風疾走長城下翻若驚禽被繳投深林
翻翅倒翼飛且鳴吾友方君量如海雷霆在前色不駭
大氣能遮猛虎行豪情欲吸長虹彩昔年獻賦遊帝都
霜蹶再蹶行吟孤整頓歸鞭視冰轍豺狼當道行不得
行行且止遇妖氛萬舶千艘屯瞰雲縱火乘風夜殺賊
幸逢天上飛將軍遇賊天津困守旬餘會京營
兵南下討賊大獲勝仗得脫腥波十

里地流血毒煙漲天結魂魄敵艦猶吟橫槊詩王師已

鎖沈江鐵沈江鐵鎖幾時開怒浪橫風埽劫灰雷轟電

掣軍聲急行舟不進帆檣迴迴檣竟取東溟道由天津出海

一帆飛泊之罟島泊登州之罟島不測風雲世外多無邊天地

人閒少扁舟有伴豁塵襟把酒還成海上吟酒酣忽記

蓬萊夢夢遊不足思登臨登岸遊蓬萊山騎驢直上一憑眺名

山疑是前生到懷古欣瞻坡老祠求真奇遇僊姑廟上有坡公祠

七僊姑廟憶君去時效馳驅追隨許我同舟車悔不同

歸附鞭鐙輸君獨覽寰瀛圖吁嗟乎人生聚散如蓬轉

亂離難得重相見江南江北好青山於今何處無征戰

渡江我亦幸生還望見崇明海上山每日船頭聞鼓角

可憐重入玉門關卽今先後歸鄉土相逢各記長途苦
征衣一領積愁塵黥痕猶認江湖雨讀君詩罷爲君歌
聽君談海海生波君之歸兮遊大羅君不歸兮可柰何
信宿雲川主胡博齋有作

頻年遊眺水雲鄉訪舊登山恨轉長蛛網添絲緣孺榻
桐花敲雨落胡牀別來無恙松千尺去後重逢雁一行
去冬子弟亦來此重遊認得到門還不叩僊風吹出藥鑪香

萬重巖翠結層樓此地曾攜眷屬遊

去秋舉家歸里道出雲川三宿於此

華屋連朝開盛宴沙隄三日泊行舟饒他山水留餘韻
惹得鶯花解別愁惆悵兒童思舊伴牽衣還問再來不

再題綠雲山房

閒從舊徑踏莓苔前度劉郎今又來粉壁尙留香篆在
綺窗還對月輪開好吟錦字詩千首曾破紅樓夢一回
記得簾波燈影裏綠雲深處是妝臺

三生石上訂前遊偶借名山一聚頭弱燕驚殘千里夢
寒釐嘯老十年秋有情燈火知離別無語梨花解病愁
眼見人間哀樂事夕陽峯影水邊樓

紀於潛程味庭大令

鍾英

平越隄剿賊事

西浙諸峯尊少祖天目東來路深阻空山人少虎狼多
跳梁突出平越隄平越隄在潛谿東山窮水盡無路通
內有榛穢惡木之蒙茸外有縣厓瘴谷之穹窿居民畏
賊賊恃險長養蛇蝎噬蛟龍紅旂綠旂煽成黨白旂相

附潛來往

地爲臨於昌三邑通逃之藪賊分三黨

殺人奪餉肆橫行流毒

鄉隅逞強項莊公曹公治斯邑心知此寇勿能戢程侯

保障兼於昌

時公以昌化令兼知於潛事

父老遮迎請殺賊程侯殺

賊何從容令眾姑勿撓賊鋒餌之牢酒賊不忌誘賊離

巢賊自窮須臾伺賊賊果出賊眾紛紛入鄉邑萬民惶

惑不敢言將軍下令紆奇策妙算神機已默成豫知狂

寇詐輸誠開門談笑出見賊猝然縛賊賊眾驚馳兵頃

刻收賊羽全軍夜發燒千炬窮追賊藪不需時繞賊重

圍賊不知明開壁壘施轟擊暗穴牆垣然火烈毒燄拋

殘社鼠紅腥風吹斷焦蛾黑沖天一炬熄妖氛三黨渠

魁盡就擒

賊首趙四喜兄弟接捕伏誅同日正法者五六十人

乘勝削平惡巢穴

募人耕種新山林

並焚陽中廬舍

羣言邑侯仁且武爲民射殺

南山虎么腐一去三邑平從此閭閻復安堵大吏論功

贊不休守土如是吾何憂方今 朝廷正用武奇才卓

犖宜封侯明年二月祁門破徽甯警備西兵過奉檄來

城昱嶺關凡泥函谷餘威播

粵匪入祁門中丞檄邑侯築昱嶺關以保督崗

大

劫滔天起負芻秋風千里吹桂苻當年始禍盡如此祇

在邊臣能早圖

龐卓雲表兄所藏竹莊道人教子圖

秀巖舅氏遊閩時得上官周所作教子圖此我生以

前事也題跋未竟而舅氏捐館舍卓雲藏之十餘年

始乞補題於予予披圖恍然曰此舅氏教子意也子

今新育麟請卽以此爲子教子資喜綴以詩

寫山恩勤嚮子思傳經心事老人知
簾金散盡留圖畫
猶憶趨庭授讀時

薪傳一卷寓深情
領畧詩書世業精
他日文孫懷祖德
披圖還聽讀書聲

馮純齋深柳讀書圖 名家驥

五柳先生種楊柳
碧蔭毵毵拂庭牖
此裏有人長讀書
四時風月閒消受
水流花落草堂空
黃鸝亂啼鹿伎走
忽來大樹馮將軍
笑飲陶公菊花酒
人間何用萬戶侯
坐擁書城室如斗
手攜一卷山海經
繞屋扶疏樹都有
翠綫春長幽鳥飛
芸編秋老僊魚守
閉門不種著書松

獨邀青眼成奇友讀君此畫三贊歎圖中命意人知否
莫似風前柳折腰仰視浮雲一搔首

爲綠雲女史修墓

十一月二十日

鸚哥山下叩泉宮繞屋煙螺雪未融破鏡愁塵添宿草
紙錢餘淚染晴楓十年短夢驚啼鳥千里歸魂逐斷鴻
此日營齋懷錦字滿林黃葉夕陽中

冬日閒居

買山無力負林泉小住琅琊亦偶然味熟茯苓逢久病
情長兒女近中年文章伴侶收寒峻筆舌生涯抵俸錢
料得家鄉如傳舍草堂廬構竹三椽

未成薄宦戀門閭鰕菜薤羹侍餽餘親老尙於餐飯健

家貧猶共族人居扁舟踏樂朝迎客稚子呼燈夜讀書
三十年前呱泣地薜蘿生意滿庭除

硯隱書懷 乙卯

不是書田卽硯田傳家惟有舊青氈一年偶住飛蓬迹
來結家鄉文字緣 是歲問字者多至百人

十載芸窗記苦吟生平何事不殫心
旁人錯認書獃子祇道文章痼癖深

敏齋訪予及寄帆信宿硯隱齋 時方館王繼泉家

薊門雲樹共旬留曾約龍山絕頂遊
此日寒齋重翦燭蕉窗初報雨聲秋 庚戌壬子癸丑三遇敏齋於京邸卽約來遊

珍重西風埽徑開不妨笠屐上樓臺
湖山入畫偏宜雨

收拾煙雲眼底來連日風雨幾敗遊興然登臥龍巖嶺
謁禹陵並登大善寺塔笠屐而行三日不倦亦
壯事也

安得鷗鳬作比鄰結廬來問鑑湖濱
淩租魚市休嫌俗
曾住神僊賀季眞時敏齋有卜鄰之約

章載坤乘楂泛漢圖

大禹隨刊牘一木吳剛持斧作艫舳太乙蓮花開未開
張騫易老歸偏速人間無復嚴君平支機石斷螭皇驚
銀河屢決瓠子破大力許借天船撐章亥行行厭徒步
橫空一摧入雲霧長風浩蕩洪濤掀蛟龍前驅翹鱷怖
君之此遊僊乎僊誰其過者李青蓮美酒一斗詩百篇
爲我寄語還問天

冬至前一日與樂平黃琴川孝廉涇祥昆明李

彤階茂材

恩樹

義烏王楚帆學博

湘

同登剡山

四明之西太白東

四明山在嵊縣東界
太白山在嵊縣西界

剡山山與天台

通巖驅谷走怒入海羣龍回首幻奇峯我來此山苦不

早雷公嶺

嶺在剡麓

上煙霞老滿地月明林木稀登高一覽

句餘小金碧樓臺擁畫屏山光水氣涵青青人煙繞郭

十萬戶漁火隔谿三兩星同遊幾輩多佳客逢萊萬里

神僊謫山谷後身還姓黃紛披老筆才尤特

琴川先以剡谿吟見

贈雲梯攜手共行行酒杯無影已三人勸君莫過前谿

去空中怕有神虎鳴我聞此閒舊有戴公宅

安道宅爲寺尚在邑

東子猷泛舟夜乘雪

縣東五里艇湖
卽子猷訪戴處

又聞支公到此開

叢林遁山猶賸纍纍石

遁山在縣南四十里有支公幾嶺漢車騎將軍求恭栖隱處

人道士幾人僊留得名山待後賢江湖萍梗難娛老何

不來此願天年幼知剡谿名未熟剡谿路讀君剡谿吟

約君剡谿住剡東剡西奇蹟多谿流下接洪濤波

谿二百里

由娥江入海

買山得海樂如何樵有斧兮漁有蓑有時昂首

青雲看飛鳥有時懼足巨浪策靈鼉興盡結茅一休息

天台老僧老更活

天台多老僧二三百歲者輒居茅舍數日不食食兼數人徑須擲

筆歸金庭

金庭洞天亦名丹池山即古桐柏山所謂丹霞赤城二十七洞天也剡中山水以此為最

在治東金庭洞天益奇兀洞天仍與人閒通與君重到

城東叩鐵佛

鐵佛寺在治東門外

王玉山求己圖

作兩石相對狀

從古奇石如奇人畫工卻走畫不成玉山王子購妙墨
圖成兩石如有神低昂俯仰相對立賓中有主主中客
畫人畫石是耶非太白成三東坡百登山潑墨結想奇
會將盡石而人之大石昂藏米芾丈小石蒼古張良師
兩石原來是一石以石求石石不知吁嗟乎世上人多
石轉少求人不如求石好誰爲磬石當中流呼石拜人
石傾倒

李鏡余師剡谿官舍竹石居圖冊

師名維著昆
明人丁未進

士爲予已
酉房師

清風一卷貯行匳寄興林泉足避炎自有杯盤留阮籍
不須袍笏借陶潛筠花唾碧苔痕補巖乳流青樹影兼

收拾剡谿好詩料畫圖山裏畫圖添

畫圖山在剡山北三十里

黃琴川還桂圖

粵匪之亂樂平兩次被兵壬子癸丑之間琴川舉家避寇歸則大喪所有宅邊多桂樹無恙因名其齋曰還桂爲圖徵詩乙卯冬與其姪子和來遊剡山索子題此

君不見五柳先生縱詩酒占盡人間好楊柳又不見王家庭院植三槐庇蔭孫子登台階天生萬物各有主非其所有莫能取乾坤亘古無易人九州應許還神禹茫茫大劫起周秦傳舍樓臺迭主賓咸陽一炬甘作俑世上從此多荆榛樂平黃氏產靈桂司花判入琴書隊管

領琅嬛小洞天含雲吐月起凡卉跳梁羣醜昏不知大
縱狐鼠齧靈芝腥風卷地人鬼哭草菅花木無完枝此
桂有神出呵護瞋膽怒魄羣凶怖拳柯作勢擎青天健
葉摩空埽毒霧草木皆兵起大呼么麼驚走秋風靡免
使淮南賦枯樹安排合浦還明珠須臾盪洗妖氛遠琴
書依舊歸僊館孤嶼梅花復姓林三陽綠竹重栖阮謂
和主人欣喜報平安喜極生悲衣淚霑流離生死重相
見樹猶如此人何堪君家藏書幾千卷鄴架傾隕亡其
半寶此老桂天所遺兩次與君共離亂噫嘻吁嗟乎此
桂通靈洵不誣人原念桂是手植桂亦索主還其廬以
桂還人桂有道以人還桂人不孤聽我長歌還桂圖

子柔任君

原韋

亦曾從屠筱園師問字者今始

於剡谿官舍識之留詩誌別

屠師名湘之丙戌進士教授杭州

人生僥倖也識字西抹東塗各言志問渠束髮誰授書

化龍飛去忘所自吾與子柔識面遲子柔雙鬢生銀絲

壯挾千金遊閩粵老託林下惜崦嵫筆硯生涯買山足

謝家庭院存蘭芝

賢嗣爾餘同在幕中

偶栖剡曲寄萍梗孤標獨

賞扶梅影登山興盡不言詩繡佛心空慣習靜我來此

遊始知名所夕相對言生平吾師弟子滿吳越不道遺

珠在此光夜明娟風僊館無人識

子柔以道光初年從吾師於陶堰惜陰書

塾之娟風館厥後師登甲第歸而改授廣文遂莫知此館

馬鬣崇封纔一尺天教伯

道竟無兒空遺斷橐成塵迹

吾師乏嗣未葬去冬與周寄凡糾資爲完窆安旣又

從孫芳牘得遺藁兩卷付梓今卽以娟風館名集如君感舊能幾人相逢猶記程門雪與君同學不同時幸此良覲誌以詩應是天公造奇遇吾師靈爽實憑之吁嗟乎歐陽門下無虛士五陵車馬紆青紫安得憶所自來盡如此嗟哉子柔吾兄事

讀念香館詩別李彤皆

丈夫不得志來作萬里遊慷慨挾千金躡足窮遐幽一時知名士停車爭唱酬歸裝不載石囊詩汗九牛昆明李彤皆大氣盤高秋名場鄙塗抹詩窟耽研按言情入杜室體物沿騷流不甯事雕飾但恐心肝嘔信筆達所見寄託何深悠淒吟淚花木險語噤松楸具此英雄膽

也工兒女愁渾然元氣中別有清光浮此才洵非易醉
眼小滇州看山迫閩海未足飽吟眸來遊浙東西剡曲
今停舟萍蹤偶相值論交與神謀嗜君一寸稟藥我沈
痼瘳挑燈再三讀天風鳴上頭渺茲嶮山路安得容驂
驅天台洞雲閉逝者阮與劉安道宅猶在誰其王子猷
勸君勿戀此矢志登瀛洲乘楂載桃葉同去看封侯風
雲會有合池魚躍龍湫猛吐匣劍氣大洗紅塵羞剡谿
一夜雪鴻爪應長留百年志嘉賞第一谿山樓剡山有樓曰谿
山第晉曹事遊歷聚散無時休明年在何處天地一沙
鷗詩成徑須別風雨聲颺颺

剡曲留別形皆琴川

都是人中客相逢得幾何莫愁知己少祇恐別離多浪
迹催人老年華與墨磨臨行無限意寒月照藤蘿
山色淩霜曉征衣著雨寒君胡行役久我已遠遊難別
夢將詩記雄心把劍看鑑湖帆影到杯酒訂餘歡

自剡歸里再寄琴川

覲面卽千里瀕行酒一卮共攬身世感況在別離時文
字緣難割滄桑事敢知天涯懷舊侶何處不如斯
又一鴻泥迹千山抱剡城逢人原落落冒雨獨行行野
樹慘無色江風噤不鳴鑑湖歸路近帆影遣宵征
來遊非得已此別更如何旅館吟聲苦寒燈老眼摩谿
山圖畫賸風雪野航歇莫道長征易江湖戰骨多

鄉國幸無恙關河愴已深裏尸懷猛士

謂高筠坡大令陶靜軒少尹

倚劍憶吟人

憶歸安鄭瘦劍茂材皖北從軍行尸多革少無人裏安得句卑舊布裳句雲日

遲初願門閭戀此身故園無長物冬筍已知春

世亂得安土家貧有敝廬硯田原是石學海尙多魚未

許宦情迫有教詩興除壯遊忘不得千里故人書

敏齋來約

北上應禮部試

偶來同車約終留翦燭緣共依潘縣樹獨讓祖生鞭旅

况須消受鄉愁合棄捐

頃聞江右告急

泥金容易報珍重杏花

天

鏡余師命與琴川同赴計借以病不果

再寄彤皆

異地相逢本偶然索居同郡轉情牽數千里外行吟客

三兩愁人話別天

謂琴川楚帆

圖畫山川多古色江湖風雪

况殘年故園春比寒山早吟落梅花一瓣先

神僊也耐轉蓬身拌得巢居共美人一半句留花下夢

十分消受異鄉春

形皆思歸顧攜陶姬自娛

安排久客情難已究竟

封侯志欲伸莫道書生今不用倚天長劍作龍吟

倪韻白馬上圖

丙辰

讀書萬卷不投筆骨相封侯亦何益方今朝廷時用

兵書生上馬能殺賊吾友倪迂才不迂珊瑚鐵網遺明

珠挾策壯遊抵河洛忽逢狂寇懷城隅

韻白於癸丑報罷禮部試遊懷

慶郡城固重

重圍四面久不解瞰雲烽火連天駭短衣

盤馬獨行行橫腰留得純鉤在天戈迅速掃機槍龍媒

得意霜蹄輕論功何止許作宰牛刀一試鯨鯢驚嗟君
此馬真長駕千年前已畫曹霸紙上毛鬣都飛鳴縱轡
如風不得下男兒樹立須強年此去逢君先著鞭萬里
歸來聞露布故人鐵硯猶未穿

周寄帆學博

晉錄

自作守帆圖屬題

人生骯髒不得志每作萬里乘風圖乘風萬里逼霄漢
風波險惡天下無周郎年少能破浪探源星宿窮殊狀
健筆曾扛書畫船揚帆珠海襟期壯老大甘司苜蓿盤
釣鼉猶把珊瑚竿低懸片席坐收舵天風吹面波濤寬
知君胸中有韜畧強弓持滿故不發三軍鵝鵲未開營
萬隊貔貅齊捲甲將軍善戰亦善守坐鎮狂瀾膽如斗

一朝解纜放中流，掀天便試屠龍手。
讀君斯圖吾浩歌，幾時滄海生恬波。
莫戀西湖好明月，此身老柰蒼生何。

秋蝶

獨留黃蝶向霜晨，回首尋芳迹已陳。
冷雨摧殘香谷樹，西風搖落故園春。
南華夢裏重遊客，天寶宮中未老人。
漫道秋花餐不得，小山叢桂自輪囷。

秋葦

滿林落葉閉閒門，唧唧蟲吟攪耳根。
桐井露寒風欲語，豆棚人靜月無痕。
銀釭老伴廬陵讀，金籠新承宰相恩。
壯志可堪逐兒戲，呼燈相照近黃昏。

擬沈休文詠湖中雁詩用原韻

滿湖寒秋光隻雁冲晨霜隔岸認栖止淩空哀翔翔洞
庭月千里關山書一行驚飛逐雪浪小憩還銀塘怕靈
夜鼓瑟羣呼歸帝鄉

秋草

青青河畔迹初迷滿目秋痕一翦齊涼雨乍零紅蓼岸
西風初薙白沙隄三更溽露侵蟲語十里輕霜鬪馬蹏
惆悵沿街書帶冷有懷花徑滑香泥

誰令卉木逼年華歲歲枯榮候不差老伴桐階承落葉
錯歸蘆岸待依花但容沙漠留青塚空有池塘屬謝家
借問遊驄何處踏平蕪荒絕暮雲賒

綠波猶記送春愁十道褰腰輭翠收紅到雁來千葉瘦

化爲螢去一星流曾邀君子垂青眼莫怪王孫怨白頭
試向南園尋履印祇餘黃蝶共綢繆

賸得詩情畫意兼淡雲疏樹不須嫌無多生意自含帶
未了青痕還入簾蒨蒨牆陰風瑟瑟藤蘿階下月纖纖
春暉報答情何極願附茅龍上屋檐

周屏山春江晴泛圖 丁巳

朝遊鑑湖暮遊鑑湖茫茫天地一鷗鳬動如參商不相
見相見非復昔日之頭顱吾與屏山文字友鏖戰名場
牛馬走聽鼓轆門冒雨風煎茶試院看星斗甲辰迄己酉與屏山
兄弟宜南耐菴篤甫健菴十載停雲寄所思西風吹散
諸君同應大小試十餘次竟何之趙北燕南我行久歸來重見玉樹枝相逢爲我

須臾立再三過從話陳迹功名氣短兒女長坐使英雄
淚霑臆千金結客悔蹉跎蒿目江湖戰壘多惆悵親年
容易老蒼生其柰此身何平時叵耐山水惡今日移居
覓巖壑君家舊住萬重山

君居暨陽十四都山水頗險

可有桃源避

蠻觸讀君斯圖三贊歎春江之水何漫漫乘槎上訴泣
眞宰願假一葉安狂瀾歸時莫便作漁隱偶向煙波息
萍梗紙鳶風裏杏花天昂頭猶喜青雲近

圖綴紙鳶一頭

小雲栖方外嘯雲香光寂照圖

圖繪梅花明月

君不見維摩居士從眾香國來香不因花花自開又不
見如來頂上肉髻圓光出光不因月月無色人間花月
了無情一洗五濁含虛清得香忘花花不著得光忘月

月自明吾師嘯雲老面壁行腳倦行返岑寂梅子熟矣
錄傳燈木樨香否飯盛鉢歸來繪作香光圖無無明盡
明盡無昔聞屯公種梅傍明月師爲屯香上人徒裔今見吾師枯
坐結跏趺放大光明洞八極便令眾生刮目濯冰壺師善醫目疾
安得靜參真覺從師老月色花香看不了禪心詩
意畫圖中誰道雲栖此猶小

楓橋家純齋授經課子圖

早識元成讀父書今知蘭玉滿庭除殘編一卷傳家學
不寶金簾寶五車

吾家元季本聯鑣

純齋昆玉皆知名士其季月峯從子問字尤能文

况又超宗

有鳳毛寄語老蘇且努力莫將文字讓兒曹

暨陽魏睡山冬夜舉杯邀月圖

戊午

睡山睡起看明月
明月入懷寒入骨
千年飢兔下窺人
乞取瓊漿醫酒渴
一杯芳冽僊平僊
能使嫦娥口流沫
芻通井絡疏酒泉
倒挽銀河穿酒窟
太史奏稱壽星見
睡山危坐頭顱禿
睡山愛酒兼愛書
書中酒氣興也勃
名心老健工文章
喜與少年談結客
泥塗蟠屈五十年
上訴眞宰天應泣
今年桂花十月開
戊午十一月十一日樹寒梅
老更活會須躡屨
凌青雲畢竟花魁
屬頭白披圖爲君
飲且歌畫裏銅瓶
酒猶熱

僧王禦寇津沽奏捷

己未三月

長隄繚繞亘沽津
疊鎖重關捍海濱
直北一軍偏議戰

江南諸部愧因人千城有寄憑專閫七鬯無驚在秉鈞
千古籌邊稀善策中流砥柱屬藩臣

叩關假館敢陳詞震疊天威在此時宰相無端先餌敵
將軍猶幸未班師火攻神策書生獻鐵騎聲靈粵寇知
不是餘氛難盡埽網開三面帝恩施

已未九月自都下南旋出平原道上題壁

雪泥鴻爪記前緣冷擁鄉愁襪被邊潦草光陰消逆旅
漂蓬情緒觸淒絃來非得已何嗟及去竟無聊倍黯然
破曉登車風撲面滿身涼雨灑塵天

歲暮自越之常山訪李鏡余師

重試征橈出鑑湖蘭江故道漸模糊

七年前曾帆迴港渡此津

口風初直潮落沙頭日已晡千里蓬漂仍作客一官匏
繫尙飢驅富春山下波如鏡照見鬚眉是故吾

富陽訪胡賡載

昌化雲川人

昨夜雲川夢裏遊今朝喜與故人謀盥薇軒下三杯酒
可記當年話別不

雲川盥薇軒遊蹟頗勝甲寅四月猶重遊其地

蒹蘆秋思滿鄉邦笑指歸程擁畫艘

癸丑十月奉二此老回里過此

日頓增風木感不堪重渡富春江

過七里隴

曾記來遊總角時桐江看月學吟詩風隨隴轉帆常飽
岸逐雲移路不知釣客無端留勝蹟美人何處寄相思
明朝去訪葉司馬要寫琵琶送客詞

謂蘭江葉春帆司馬爲舟

過子陵釣臺

兩點星精下九霄

臺石對峙

不經雨蝕與風漂莫言寸土無

光武究竟高臺屬漢朝

昔人釣臺詩以子陵有釣臺光武無寸土之句爲最竊意不然

樹影擎雲窺澗底纜痕拖翠上巖腰我來此地良非偶

廿七年前泊畫橈

癸巳年隨先大夫雨過此臺於今二十七年矣

夜泊蘭江訪葉春帆不遇

玉碎珠沈劇可憐秦淮河上劫灰寒春江花月無人管
留得笙歌在畫船

高樓燈火萬人家十里長街夜市譁難得鶯歌偏耐冷
蓬窗呵指弄琵琶

欲到潯陽問去程誰知司馬已南行輕舟一舸杭桃葉

先我揚帆看月明

春帆於十日
前攜眷官聞

夢雲川舊遊

隔岸春雲水碓聲
谿流嘯石鐵篙鳴
疏星淡月灘頭泊
記得唐昌道上行

淒涼舊雨話雲川
零落晨星每黯然
昨夜西風吹夢去
盤薇軒下遇神僊

三衢道上

水曲山灣叵計程
衝波戴雨上灘行
消磨不盡輪蹄鐵
化作鳴篙觸石聲

舟人多
用鐵篙

石走巖驅上九霄
千重梯棧閣飛濤
怪他百尺寒潭底
已比吳山頂上高

三衢舟次送與星聚別駕之閩

同在人中感數奇

星聚亦方遭大故

無端萍聚又臨歧名途險

阻上灘水世事推遷殘局碁一舸疏篷篩密霰半帆寒
雨漏晨曦輸君此去僊霞嶺飽看千山雪霽時

舟行風雨夜抵常山

谿流百里淺如溝已近衢河水盡頭一夜東風晴不到
獨留寒雨打孤舟

一重山色一重灘到此方知行路難爲釀程門三尺雪

天公加意作

去聲

嚴寒

憶剡遊自常山寄王楚帆

浪遊何處不泥鴻零落晨星憶剡中地下驚心多宿草

朱佩莊李彤皆先後下世天涯分手輒漂蓬黃琴川北無耗儒冠誤我雖
毛禿露布輸君筆時王在白沙關軍營此日飢驅懷舊雨漫
山風雪一燈紅

臘杪歸自常山

定陽軍裏整歸鞭李師新設爆竹聲中又一年比歲征

帆多雨雪去歲今日舊遊山水半烽煙檣迴嚴瀨風盈

隴潮落之江浪拍天底事鄉關偏戀我倚裝重返鏡湖

船

補勤詩存卷之三